

ZULPRINS

Entschattas – esser denter il vargau ed igl avegnir

SVENJA KAIB/GIURU

Ah gie, novas entschattas. Entschattas porschan adina dus differents aspects. In da quels ei schar encrescher per quei ch'era ina gada ed igl auter ei la malsegirtad, denton era il plascher per tut quei che suonda aunc. Mintga persuna en mintga vegliadetgna scuntra novas entschattas, sco jeu era. Ina da quellas era per mei la decisiun da far sunter il gimnasi in onn intermediar. In onn cun bia temps da ponderar tgei ch'jeu spetgel da miu futur. Sper las ponderaziuns havevel jeu era aunc avunda temps da luvrar.

Quellas duas caussas han purschiu a mi ina fetg buna basa per ils proxims pass en mia veta. Senza quei onn intermediar havess jeu ella retrospectiva buca fatg las dretgas decisiuns per mei e fuss ussa buca nua che jeu sun. Per esser pli exacta fuss jeu ussa buca a Vienna. Sco gia menziunau havevel jeu avunda temps da ponderar e da veser differents caussas che han influenzau mia decisiun. L'idea dad in di habitar a Vienna havevel jeu gia pli baul, mo che quella idea vegni aschi spert realitad hai jeu mezza buca spitzgau. Igl onn vargau hai jeu passentau bia temps a Vienna ed hai adina sentiù pli e pli fetg che quella citad ei per mei sco in niev da casa. Cura che la decisiun ei curdada da definitivamein bandunar mia patria e da far miu studi egl'exteriur, sun jeu el medem mument puspei stada all'enschatta dad in niev capetel en mia veta. Tut quei che jeu hai tochen ussa enconuschiu e baghegiu si en Svizra hai jeu bandunau.

Ussa sesel jeu sper il Danubi ed igl'emprem aspect semuossa. Numnadamein igl'aschi encrescher per quei ch'era ina gada. Jeu mirel el horizont e jeu vesel



Realisar ils siemis lunsch naven dils cuolms giu sper il Danubi.

FOTO MAD

negins cuolms. Sper mei sesan buca mes amitgs ed amitgas sco usitau. Era mia famiglia spetga buca mei a casa cun in «hallo», sche jeu fetschel in pass en dad eschcasa. Denton ei quei buc in sentiment

trest mobein in sentiment nunusitau. Quei che jeu hai bandunau en mia patria ei buca semplamein svaniu, tut exista aunc adina entuorn 600 kilometers naven da cheu. Spert hai jeu denton era fatg

enconuschientscha cun la malsegirtad ch'igl'avegnir porscha. Clar, tut exista aunc 600 kilometers naven da cheu, denton sai jeu buca adina recuorer a quei. Jeu stoi ussa mezza baghegiar si a mi enzatgei en quella tiara aunc jastra. Tgei, sche jeu anffel buca nova glied che vul passentar temps cun mei? Tgei, sch'il studi ei buca aschia sco quei che jeu hai s'imaginau? Tgei, sche jeu hai buca pli bia contact cun las persunas en mia patria e tgei, sche jeu stun mal per la decisiun che jeu hai priu? Biaras damondas cun biaras differents rispostas. Naturalmein van ins adina ora dil «worst-case scenario», ins sto gie seppepar per quellas situaziuns. Era jeu hai dramatisau tut ils differents scenaris che savessen schabegiar, mo quei hai jeu spert schau star.

Sch'ins focussescha memia fetg sin las mendras caussas che san schabegiar, ves'ins buca las novas e bialas caussas che schabegian. Glied cun ils medems interess anflan ins adina en in marcau, oravontut en ina metropola da circa dus milliuns habitonts sco Vienna. Il contact cun las persunas ella patria vegn era a star, denton en in'otra moda e maniera. Era sche jeu havess da star mal in di per mia decisiun sesarvan puspei biars differents eschs per proximas decisiuns che porschan puspei novas entschattas. Proximas decisiuns per quellas ch'ins vegn forsa era a star mal. Ins sa buca tgei che schabegia ils proxims onns ni schizun las proximas secundas, mo quei duess buca esser in frein per la realisaziun dils agens siemis. Cun far quitaus piardan ins mo temps. Temps ch'ins drova per veser las bialas caussas, sco jeu il Danubi cun ils radis da sulegl che vegnan reflectai dils sgrataneblas visavi.



Ils «zulprins»

Ils «zulprins», uschia sa numna la rubrica per auturas ed auturs giuvens, ina rubrica che cumpara en collavuraziun da la GiuRu Giuventetgna Rumantscha cun la FMR Fundaziun Medias Rumantschas. La finamira cuminaivla da GiuRu ed FMR è da dar spazi e vusch ad auturas ed auturs giuvens. Ils «zulprins» duain damai far qua u là sbrinzlas!

Dapli infurmaziuns davart la GiuRu sin www.giuru.ch ubain via mail a giuru@giuru.ch.

ORIZONTS

Il temps (Psalm 90)

Nus essan adina puspei sut la pressiuin dil temps. Ins sto prender decisiuns e consequentamein lu daventar activs ni era buca. Quei tut e bia auter ha da far cun il temps. Quel vegn, ei cheu e varga puspei. Da temps en temps s'annunzian tier nus igl'apetit, forsa schizun la fom e la seit. Medemamein sefa era nies entelget valer. Era quel annunzia sias pretensiuns, e la finala schizun quella dalla sien. Noss'entira veta sespleiga enteifer il temps ch'ei daus a nus.

Tals e semeglionts patratgs e fatgs han occupau gia daditg numerus carstgauns, aschia era igl'autur dil Psalm 90. Ei secontracta dil sulet Psalm che duei ver giu siu origin tier il menader dil pievel d'Israel, numnadamein Moses. Il text dil Psalm

90 s'avischina en plirs graus agl'emprem cudisch da Moses, Genesis, sco era al tschunavel, Deutoronomium.

Sco in fil tgietschen percuoran ils patratgs en connex cul temps quei Psalm cun ses 17 vers; aschia secloman gia ils emprems sco oraziun d'in carstgaun cartent: «Segner, ti eis nies refugi da schlatta en schlatta. Avon ch'ils cuolms neschien ed il mund e la tiara vegnien formai, eis ti, o Diu, da semper a semper.» Il Psalm continuescha cun ils vers 4 tochen 6: «Gie, melli onns ein per tei sco il di dad ier, cu el ei vargaus... els ein sco la sien, sco la jarva che catscha la damaun. La damaun flurescha ella e catscha, la sera vegn ella passa e secca.»

Quei ei pilver il temps ch'ei daus a nus, bugen ni nuidis. «Tut ha siu temps!», legin nus era el cudisch ord il Veder Testament, il Predicatur (Pred 3,1). Il temps arriva, ei cheu e svanescha. «Nos onns van a fin sco in suspir», aschi cuort, aschi stentus? Semegliont era egl'emprem cudisch da Moses: «Il temps dalla veta d'in carstgaun cuoza 120 onns» (Gen 6,3b). Empau pli exact savein nus leger en nies Psalm: «Nossa veta cuoza siatonta onns e sch'ei va bein cun nus otgonta onns» (Ps 90,10a).

Mo, era leu vegn fatg menziun da bia mulesta e grevadetgna. «Els, (ils onns) vargan dabot, nus sco sgulein.» Denton era la supplica: «Muossa a nus da dum-

brar nos dis, che nus contonscheien sabientscha» (Ps 90,12). Per quel che scriva questas lingias vala quei dublamein. Sunter in grev accident enten far bogn el Lago Maggiore in collaps dil cor – senza schientscha – reanimaziun – reintegratiun el spital a Ligiaun. Aschia fa il pertuccau exact quellas experientschas: Conscients en mintga di. Gie, veramein mintga minuta vegn «dumbrada». Igl'ei sco en ina nova, secunda veta, nua che veramein «sabientscha vegn contunschida.»

Semegliont vegn era urau vinavon en quei Psalm: «Saziescha nus la damaun cun tia buontad, che nus selegrien e giubileien tut nos dis» (Ps 90,14). E vinavon secloma ei en quei Psalm: «Legra nus tons

dis sco ti has squitschau nus, tons onns sco nus vein stuiu veser sventira.»

Cheutras muossa Dieus a nus sias ovras, magari stentusas e fadigiusas, mo lu era emperneivlas e legrevilas.

Veramein sentiù aschia, lu era leds, cuntents ed engrazieivels. Gie, ual sco il Psalm finescha: «La beinvuglientscha dil Segner, nies Diu, seigi cun nus! Lai prosperar l'ovra da nos mauns!» (Ps 90, 17)

Aschia sa il buntadeivel Diu semanifestar: El operescha viaden en nies temps, beinduras fetg direct e persunalmein. A nus ei dada la cunzina da «dumbrar nos dis» ed aschia vegn empermess da «contonscher sabientscha».

sur Sep Fidel Sievi, ant. plevon



Vista e senda vers Zervreila.

FOTO DANIELA DERUNGS